



INATSISARTUT

Aningaasaqarnermut Aatsitassanullu Naalakkersuisoq

Ulloq: 24. maj 2016
J.nr.: 01.31.06/16-00715

Aningaasaqarnermut Akileraartarnermullu Ataatsimiititaliap pingasunngornermi ulloq 11. maj 2016-imi aalajangiineranik Naalakkersuisunut ilisimatitsineq.

**Ilaasunik angallassinermut kiffartuussinissamut isumaqatigiissutinik sivitsuinissaq
pillugu isumaqatiginninniarnissamut piginnaatitsissut. - Suliaq nr. 01.31.06/16-00715.**

” Naalakkersuisut inassutigaat,

- Kalaallit Nunaanni ilaasunik angallassinermut isumaqatigiissutit pioreersut, AI2016-imi kontomut pingaarnermut 72.20.05 Ilaasunik angallassinermut tapiissutit, oqaaseqaat nr. 1-imi sinaakkusiussat iluanni isumaqatiginninniarnissamut sivitsuinissamullu Naalakkersuisut Ineqarnermut, Sanaartornermut Attaveqaqatiginnermullu Naalakkersuisoqarfik piginnaatissagaat. Aningaasaqarnermut sinaakkusiussat kiffartuussinerullu qaffasissusissaa isummernissamut tungavissiami matumani, kiisalu ”Isumaqatiginninniarnissamut piginnaatitsinissaq pillugu allakkiq – Ilaasunik angallassinermut tapiissutit”-nut ilaliussami nassuiarneqarput”.

Aningaasaqarnermut Akileraartarnermullu Ataatsimiititaliap oqaaseqaatai apeqqutaalu:

Qinnuteqaat una konto pingaarnermut 72.20.05-imut, ilaasunik angallassinermut tapiissutitut tungavoq. Namminersorlutik Oqartussat sullissisullu kiffartuussinissamik isumaqatigiissutaat tungavigalugu nunaqarfinni isorliunerusunilu ilaasunik angallassinermut ingerlaannarnissaanut akiliuteqarnissamut aningaasartuutitut matussutissatut aningaasaliissutit tunniunneqartarput.

Nunatsinni ilaasunik angallassinermut isumaqatigiissutit pioreersut aammalu taakku sivit-sorneqarnissaat pillugit isumaqatiginninniarnissamut Ineqarnermut, Sanaartornermut Attaveqarnermullu Naalakkersuisoqarfiup piginnaatinneqarnissaa akuerineqassasoq Naalakkersuisut inassutigaat. Konto pingaarnermut 72.20.05-imut, ilaasunik angallassinermut tapiissutitut tungasumut, oqaasertaliussaq nr. 1 Naalakkersuisunit innersuussutigineqarpoq.

Allakkakut 26. april 2016-imeersutigut ataatsimiititaliaq arlalinnik apeqquteqarpoq Naalakkersuisunit allakkakut 6. maj 2016-imeersutigut akineqartunik. Naalakkersuisut akissutaat allanik apeqquteqarnissamut tungavissiivoq.

Kaammattuut 1:

Nunap immikkoortuisa ataasiakkaat qanoq akulikitsigisumik tikinneqartarnerat pillugu takussutissiamik naatsumik ilaqartillugit kiffartuussinissamik isumaqatigiissutit atuuttut assilineqarnerisa nassiunneqarnissaannik kissaatini ataatsimiititaliap uteqqissavaa.

Apeqquut 1:

Tunniussinissamat piumasaqaatit sullissinerup isumagineqarnissaanut qulakkeerinninnissamik, pitsaassutimik CSR-imillu imaqtartut itisilerneqarnissaat allakkamini 26. Aprilimeersuni ataatsimiititaliap kissaatigaa. Tamatumani tunniussisarnermut piumasaqaatit sisamaasut taakku silaannakkut imaatigullu ilaasunik angallassinermi kiffartuussinissamat isumaqatigiissutit nutaat pillugit Naalakkersuisut 12. juni 2015-imi qinnuteqaamminni, suliaq nr. 01.31.06/15-00690, eqqaasaat matumani innersuussutigineqarnersut paasissutissiissutigineqassasoq ataatsimiititaliamit kissaatigineqarpoq. Tassani tunniussinissamat piumasaqaatit ima agguarneqarput: Aki: 60 %; Pilersuineq: 20 %; Pitsaassuseq: 15 %; CSR: 5 %?

Apeqquut 2:

Naalakkersuisut akissummini ima allapput ”Tamatumunnga atatillugu ukiuni tulliuuttuni angallassinermi suliassat assartuussinissamullu pisariaqartitsinerit ilaasa suussusiisa allangornissaat, atorunnaarnissaat allannguuteqarnissaallu eqqarsaatigineqarsinnaavoq, tamannalu isumaqatigiissusiassani eqqarsaatigineqassaaq.” (qupp. 2). Naalakkersuisut nangillutik allapput: ”Nunap immikkoortuini, attaveqaatitigut annertuumik allannguiffiunngitsuni siunissamat ungasinnerusumut siunnerfeqarluni isumaqatigiissusiornissaq iluaqutaassaaq, tamatumalu angallassinermi suliassani ataasiakkaani akit appasinnerulernerisigut takussutissaqarnissaa neriutigineqarpoq.”

- Tamanna ataatsimiititaliamit ima paasineqassanerluni angallasseriaatsip qanoq allangornissaanut mittarfissat nutaat kisimik apeqquutaasutut Naalakkersuisunit isigineqartut?
- Tamanna ataatsimiititaliamit ima paasineqassanerluni angallasseriaatsip maanna atuuttup ingerlatseqatigiiffiit, tassungalu ilanngullugit Air Greenland, Arctic Uniaq Line allallu maanna atorineqartut atorlugit ingerlateqqinneqarnissaa Naalakkersuisunit kissaatigineqartoq? Tassunga atatillugu sorphaat isumaliutigineqarpat?

Apeqquut 3:

Paasissutissat ataatsimoortut sullissisuneersut ajorluartumik naammanngitsut Naalakkersuisut akissummini allapput. Tamanna ataatsimiititaliamit ima paasineqassanerluni kiffartuussinissamik isumaqatigiissutit aqutugalugit suut akilerneqartarnersut imaluunniit akiliisoqarpallaartarnersoq akiliinikipallaartoqartarnersorluunniit Naalakkersuisut ilisimanngikkaat?

Tamanna ataatsimiititaliamit ima paasineqassanerluni kiffartuussinissamik maanna isumaqatigiissuteqarfigineqartut assartukkamik annertussusiat ilaasullu amerlassusiat pillugit nalunaarutimik eqqortunik tunniussineq ajortut, tamannalu pillugu silaannakkut angallannermut nunat tamalaat maleruagassaannut naapertuuppa?

Apeqquut 4:

Kiffartuussinissamat isumaqatigiissuteqarnissamat atatillugu Mittarfeqarfiit atuuffissaat qanoq pingaartinneqartiginiarnersoq itisilerneqassasoq ataatsimiititaliamit kissaatigineqarpoq.

Apeqquut 5:

Angallannerit ilusaannik ataqatigiitsitsinissap akillu ilusaasa paasiuminartuunissaannik anguniagaqarneq Naalakkersuisut oqaatigaat. Angallannerit ilusaannik ataqatigiissitsinissaq qanoq qulakkeerniarneqarnersoq aammalu akit ilusaasa paasiuminartuunissannik oqarneq qanoq isumaqarnersoq itisilerneqassasut ataatsimiititaliamit kissaatigineqarpoq. Tassunga

atatillugu akit paasiuminartuunissaannik oqarneq ima paasineqassava ungasissuseq ataaseq assigimmik akeqartinneqassasoq?

Apeqquut 6:

Billestit akiisa qaffannginnissaat kiisalu nunatta karsianut sapinngisamik annikinnerpaamik artukkiisussanngorlugit kiffartuussinissamut isumaqatigiissuteqarnissaq Naalakkersuisunit qanoq qulakkeerniarneqarpa?

Apeqquut 7:

Naalakkersuisut akissummi ima allapput: ” Oqaatigineqareersutut suliassat aaqqinneqarnissaannut aningaasaliissutinik aalajangersimasunik, pissusiusut tunngavigalugit aammalu oqaatigineqareersutut ilaasut namminneerlutik akiligassaannik, pitsaassutsimik, ilorrisimaarnassutsimik il.il. tunngaveqartunik immikkoortitsisoqarsimavoq.”

- Tamatuma erseqqissarneqarnissaa ataatsimiititaliamit kissaatigineqarpoq.
- Tamatumunnga atatillugu tamanna ima isumaqarnerluni agguaassinissamut pingaarnersiutinik arlalinnik arlaanni allassimasoqartoq?
- Siusinnerusukkut neqeroorutigineqartuni suut pingaartinneqarsimanersut Naalakkersuisunit paasissutissiissutigineqarsinnaava?

Apeqquut 8:

Namminersorlutik Oqartussat neqerooruteqartarnermi inatsisitigut tunngavigisaat malerua-gassaallu ataatsimiititaliamut nassuteqqullugit Naalakkersuisut qinnuigineqarput?

Apeqquut 9:

Isumaqatigiissusiornissamut piumasaaqatit appasinnerpaaffissaattut naalakkersuisut piumasariarpat? Soorlu, kiffartuussinissamik isumaqatigiissut sulisunik ikilisaannginnissaq siunertaralugu? Naalakkersuinikkut siunnerfigineqartut inuit angallannerannut qanoq allannguisussaassangatinneqarpa?

Apeqquut 10:

Aningaasat qanoq sumullu atorneqassapat? Kikkut sullissilernissaat anguniarneqarpat?

Apeqquut 11:

Mittarfiliornissanut aningaasaliinissamik malitseqartitsisoqassava?

Apeqquut 12:

Mittarfiliornissat kikkut pilersaarusiorlugu ineriartortissavaat?

Aningaasaqarnermut Akileraartarnermullu Ataatsimiititaliami ikinnerussuteqartoq Inuit Ataqtigiit ilaasortaataat ataaseq ikinnerussuteqarluni oqaaseqaammik imaatumik saqqummiussivoq:


Isumaqatigiinninniarnissamut pisinnaatitsissut akueraara, taamaattorli Nunatta avataani suliariumannittussarsiuussiniarneq siunniunneqartoq tunngavilersugaanngimmat isumaqatiginngilara.

Ataatsimiititaliap suliamik sularinninnera ingerlaqqissinnaaqullugu apeqqutinut siuliani taaneqartunut allakkatigut akissummik piaartumik nassiusseqqullugit Naalakkersuisut

qinnuigineqarput. Kiisalu akissutit assilinerit oqaatsit marluk atorlugit qarasaasiakku uunga nassuteqquneqarput: saam@inatsisartut.gl.

Aningaasaqarnermut Akileraartarnermullu Ataatsimiititaliap aalajangiinera
Siuliani allassimasutut oqaaseqarluni Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit **akuerineqarput**.

Ataatsimiititaliaq sinnerlugu



Jens Immanuelson

Aningaasaqarnermut Akileraartarnermullu Ataatsimiititaliap Siulittaasua